



Surangi Fernando-Monn

* 21-09-1979 †11-04-2003

(U.D.) Ils 11 d'avrel 2003 ei la giuvna Surangi Fernando-Monn sedurmentada tut anetgamein per adina suenter ina cuorta, maligna malsogna el spital a Cuera. Bia memia baul ha ella fatg siu davos grond viadi. La mort prematura ei succedida senza preavis, per nus tuts nunspetgada ed era la Surangi haveva aunc bia plans e siemis. L'jamna sontga havein nus accumpignau ella a siu davos ruaus.

La Surangi ei naschida ils 21 da settember 1979 a Negombo en Sri Lanka. Cun 9 onns ei ella vegnida en Svizra, ensemene cun sia mumma Jasinha. Sco jastra ha Surangi visitau las scolas a Sedrun, ha anflau amitgs e collegas ed ha passentau ina biala affonza. Surangi haveva 16 onns cura che sia mumma ha maridau Silvio Monn ed il bab ha adoptau la buoba e sco Svizra sesentev'ella bein. Cuort temps pli tard ei il frar Rawin, ch'era siu solegl, naschius. La famiglia era per ella in liug da seruassar.

La Surangi haveva aunc bia plans e siemis. In da quels siemis era da menar in hotel. Cun bia premura e fantasia ha ella, ensemene cun siu preferiu um Chinthaka Fernando da Sri Lanka, surpriu il hotel Postigliun. Bia quitau e lavur, mo era cuntentientscha han purtau satisfacziun.

Ils 11 da matg, exact in meins suenter la mort, levan els dus far nozzas a Sri Lanka. Tgei cunfar quei ha dau; vestgiu alv, ornamenti, invitaziuns e tut las preparativas che s'audan tier ina nozza, tut ei stau per nuot, ni forsa tuttina buc? Il vestgiu da nozzas ha ella astgau purtar el vischi tier sia atgna sepultura. In maletg impressiunont per tut tgi che ha visitau e priu cumiau dad ella en quels davos trests dis.

Negin era preparaus sin quei mument, da stuer dar adia per adina sin quella moda alla cara Surangi. Per la famiglia ei quei stau ina frida ch'ei strusch da supportar. Ei drova temps per che nus saveien dir gie alla veglia da Diu. Cara Surangi, rauissa en pasch. Nus schein encrescher per Tei, mai vegnin nus ad emblidar Tei.